

摘藻堂四庫全書薈要

集部

欽定四庫全書薈要卷一萬六千六百十六

集部

大全集卷五

明 高啟 撰

五言古詩

吳王郊臺

周網昔隳頓禮樂由諸侯吳子之代德居然祀圜丘燔
燎升紫壇青絃映玄表靈明豈來歆幣玉空旅羞國南
見遺墳蕭條委山陬雲和罷九奏草樹鳴飈颺從來跋

扈徒幾人效其尤魯郊失禮始聖筆書春秋

長洲苑

中國久無伯闔問思騁功講蒐開別苑訓武出離宮宰
詔應驂乘巫臣實御戎鼙鳴深谷應且掩廣場空遠曳
捎雲旆高彎射月弓三驅儀已畢七伐步還同甲騎從
輿後蛾眉侍幄中煮胎須紫豹肺掌得玄熊樂事方難
極英圖忽易窮城迷歌黍客地屬采菱童輦道崩秋雨
旗門失晚風犬亡銳肆狡人去雉爭雄草樹迎蕭索湖

山罷鬱蔥猶疑見獵火寒燒夜深紅

角里邨

高皇本壯士提劍定四方晚為兒女情悲歌起彷徨愛
子欲建儲寵姬方侍側顧驚四老人謂已成羽翼大臣
豈不諫孰能幹天機彼翁何為者足見人心歸始潛避
秦君終出安漢嗣世羅焉能羈舒卷聊自肆我來角里
邨如入商顏山紫芝日已老黃鵠何時還斯人神仙徒
千載形不滅猶想蒼巖中白頭卧松雪

死亭灣

貧賤衆所棄豈惟愚婦人
珪組何重輕能令變交親
翁子昔未達妻去恥負薪
五十非晚貴不能待終晨
一旦謁帝閭還家繡衣新
郎吏驚赤綬邦人候朱輪
無顏見故夫自殺此水濱
誰知孟德耀元在爾東鄰

毛公壇

欲觀漢壇符東上縹緲峰
葛花墜寒露夕飲清心胃
月出太湖水鶴鳴空磴松
真境久寂寥蒼苔閤靈蹤
嘗聞

綠毛叟變化猶神龍世人豈得見偶許樵夫逢攀險力
易疲探玄志難從歸出白雲外空聞仙觀鐘

稚兒塔

黃土但埋骨豈能埋性靈昔聞宿草間曾吐蓮花青身
卧長夜臺口誦西方經尋跡殊窅窅聞聲每泠泠寒燈
照空塔時有山僧聽應使鄰家魂沉迷盡皆醒

三賢堂

吾邦古名藩出守皆時賢有唐三使君風流最能傳韋

公既前蹈劉白乃後連政成屬時康民瘵各已痊良辰極
游會消搖若神仙畫戟衛高館彩舟漾平川晨移閒齋檜
夕賞華池蓮逸韻邁羣流豈將文墨牽至今郡中人猶想
布治年時事屢變易遺祠委榛煙湖山少清氣草木空餘
妍嗟我生苦遲無由厠賓筵殷勤展夙慕載詠西樓篇

干將墓

干將善鑄劍劍成終殺身吳伯亦遂亡神物豈不神始
知服諸侯威武不及仁徒勞冶金鐵精光動星辰莫耶

應同埋荒草千古春青蛇塚間出猶欲恐耕人

吳桓王墓

朝出南郭門高墳鬱蒼蒼借問葬者誰乃是長沙王黃
腸豈不錮盜發取所藏金環出世間封樹無暉光緬想
衰炎際當塗逞奸強英雄失所據虎視誰敢當王初奮
穉孤英風凜飛霜談笑定江東賢豪歛來翔少假須臾
年足見伯道昌胡為困仇奴輕獵不自防天意豈佑魏
遽使斯人亡因觀感往事喟焉令人傷

虎丘次清遠道士詩韻

神仙不可羈乘螭躡雲漢豈將避羸劉荒山事窮竄何
年東觀海一至此峰翫悠悠清詩傳宦宦遺迹漫我來
繼登臨長嘯幘初岸旣秋煙蘿疎欲雨風竹亂夜深空
潭黑月吐石壁半龍驚汲僧來鳥喜遊客散閣掩林下
夕鐘鳴巖中旦勝賞誰能窮今古付篇翰飛騰子何之
汨沒余可歎安得契眞期超然豁靈贊

天平山

入山旭光迎出山月明送十里松杉風吹醒塵土夢茲
山凡幾到題字遍巖洞陽崖樹冬榮陰谷泉夏凍怪石
立誰扶靈草生豈種白雲蒼然來諸峰欲浮動高鶻有
危棲幽禽無俗哢凌薜知履滑披嵐覺裘重嘗登最上
顛遠見湖影空漁樵度谿孤鳥雀歸邨衆還尋老僧居
隔竹聽清誦慰我躋攀勞為設茶筍供幾年歷憂歡造
物若擲弄迷途遠山林遲暮堪自訟難追謝公遊空發
阮生慟身今解組紱明時愧無用閒持九節筇尋訪事

狂縱石屋秋可眠山猿許分共

讀書所為錫山朱隱君子敬賦

高士寡所嗜雅情竹素間北窗夏陰敷散帙欣燕閒流
觀古始來治忽儼未刪重華去已遠鳴鳳何時還微言
雖能尋往躅那可攀當感旣拊懷遇得亦解顏詠歌南
風前至樂孰與班方爾對聖賢俗子毋扣關

丁山人清越軒

夏雨濯高綠氤氲冒茲軒微涼灑林表沉色泛谿源羨

子耽獨賞慙予嬰衆喧披襟一蕭散憶在郭公園

西齋池上芙蓉

池荷已衰颯孤艷仍獨在滄洲遠夢違風露妍姿改窈
窕徒自媚寂寞還誰待此地托根偏非無美人採

贈張主簿

離離平阜禾纂纂橫林棗客行愛樂土秋晚華亭道傳
燭春紡遲鳴榜潭魚早借問何能然年來縣官好

客有不樂者

客有不樂者默坐空堂幽明燈照孤影對酒不能酬風
雨忽夜至單衣颯驚秋葉墮已懣懣蟲鳴尚悠悠於當
屬有念苦願羣聲收讀書仰千古命駕志九州孰云吾
多智有已不解謀冥飛旣難攀苟得亦可羞守道固寂
寞寂寞諒難尤

送張文學之樵李

回川帶綠樹窈窕有鳴禽江郭去非遠傷離空滿襟林
中古殿靜池上高齋陰應想彈琴士杏花春雨深

贈羣上人

湖雨洗秋碧西南見諸峰中有楞伽僧迴閱超世蹤高
風搖飛泉落日帶遠松欲往已知處煙蘿鳴飯鐘

送李別駕赴越

常別豈不感此別尤可嗟一別一去遠魂斷秋無涯我
何恨別君君猶別其家霜露滿故園不待菊有花越禽
啼楓林路盡秋日斜到郡且足樂聞有山水嘉

龍門

龍門何崢嶸此地表奇蹟山分兩崖青天豁一罅白知
非禹功鑿想是鬼手劈長為風雨關開闔自朝夕深合
未吐雲對峙不崩石日光寒易傾苔色陰更積只疑過
此內便與人境隔始窺已幽深漸入尤險窄暗中把危
藤蜿蜒欲驚魄僧留看古刻敲火照絕壁晚間松竹號
洶若波浪激不知神魚飛到此誰點額我嘗謁真龍天
門謬通籍何必更區區求為李膺客

太湖

長谿如白虹分走荆雲派具區納羣流襟帶三郡界太
虛混鴻濛元氣流沆瀣初疑溟渤寬稍覺雲夢隘茫茫
鴈飛遲颭颭帆度快雨來鼉報鳴風起鷗驚邁神龍作
淵都豈復數鱗介珠光照水府不受白日曬朝看砲車
雲雪浪動澎湃聲吹地將浮勢擊山欲壞黃頭雖輕生
捩柁不敢懈有時湛明鏡峰吐青幾塊煙中樹若莎波
上舟如芥漁就沙岸炊客來水祠拜震澤思禹功夫椒
記吳敗白魚逢夏出黃柑待秋賣我性好遊觀夙負雲

水債欲尋鵝夷舸不顧涉險戒人生亦何為世故自拘
械萬事風飄花百年露垂蠶何當叩林屋秉炬訪仙怪
試探不死方為人起痾瘵

天池

靈峰可度難昔聞枕中書天池在其巔每出青芙蓉湛
如玉女盆雲影含夕虛人靜時飲鹿水寒不生魚我來
屬始春石壁煙霞舒灩灩月出後泠泠雪銷餘再汎知
神清一酌欣慮除何當逐流花遂造僊人居

劍池

干將欲飛出巖石裂蒼礦中間得深泉探測費修綆一
穴海通源雙崖樹交影山中多居僧終歲不飲井殺氣
凜猶在棲禽夜頻警月來照潭空雲起噓壁冷蒼龍已
化去遺我清絕境聽轉輓轡聲時來試新茗

練瀆

吳越水為國行師利舟戰夫差開此河餘艘試親練十
萬凌潮兒材比飲飛健鼓棹激風濤揚舠逐雷電當時

意氣盈謂已無勾踐鷗避去沙州龍愁閉淵殿恃強非
伯圖倏忽市朝變臺上失嬌姿泉間掩慚面至今西山
月恨浸秋一片猶有網魚人時時得沈箭

明月灣

木葉秋乍脫霜鴻夜猶飛扁舟弄明月遠度青山磯明
月處處有此處月偏好天濶星漢低波寒芰荷老舟去
月始出舟迴月將沈莫照種種髮但照耿耿心把酒酌
水僊容我宿湖裏醉後失清輝西巖曉猿起

越來溪

溪上山不改溪邊臺已傾越兵來處路流水尚哀聲昨
日荷花生今朝菱葉死亡國不知誰空令怨溪水

採蓮涇

青房戢多子採得儂心喜今夜水風涼君王宿船裏行
處綠雲迷歌聲一道齊回頭調越女何似若耶溪

顧辟疆園

江左風流遠園中池館平賓客久寂寞狐兔自縱橫秋

草猶故綠春花非昔榮市朝亦屢改高臺能不傾

松江亭

泊舟登危亭江風墮輕幘空明入遠眺天水如不隔日
落震澤浦潮來松陵驛縣縣洲潄平莽葦莢積凭欄
不敢唾下有龍窟宅帆歸雲外秋鳥下煙中夕欲炊菰
米飯待月出海白喚起弄珠君閒吹第三笛

南峰寺

樵歸衆山昏天峰尚餘景欲投石門宿更度西南嶺遠

聞雲間鐘蘿逕入寺永懸燈照靜室一禮支公影鳥鳴
澗壑空泉響窗戶冷對此問山僧何如沃州境

楞伽寺

夕陽西下嶂返照東湖水來尋古寺遊楓葉秋幾里叩
門山猿驚維馬林鳥起鐘聲出煙去半落漁舟裏楞伽
義未曉塵累方自恥欲打塔銘碑從僧乞山紙

慧聚寺

鳴鐘警迷方枯僧兀趺牀石姿生寒稜松子落古香殿

鎖山雨氣樓迎海
曙光遙望蒼蒼城
愁是車馬場

寒泉

遠落叢峰間
平流盤石上月照
欲成潭風吹不生浪
聲兼寒葉下色映秋
苔漲野客照羸顏
曾來倚筇杖

乘魚橋

橋上西遊人
橋下東流水
遊人如水流
朝暮何時已
誰知有飛仙
赤脚踏神鯉
波驚風蕭蕭
渡海秋萬里
左招騎龍君
右攜乘鸞子
笑餐紫雲英
同詠珠宮裏
歸來舊

城郭千載一日耳下看橋上人還隨鷄鳴起去者已如
灰來者猶似螳不解養谷神紛紛自生死

支遁菴

閒登待月嶺遠扣棲雲闕石室閉千載高僧猶未還殘
燈黃葉下古座青苔間不見跏趺影鶴鳴空此山

鬪鴨篇

春波漾羣鳬戲鬪每堪翫宛轉迴翠吭襍褊振文翰聲
兼江雨喧影逐浦雲亂嗷喋隊初交紛披勢將散持敵

忽同沈呼儔更相喚時陳水檻側或聚湖亭畔長鳴若
賈勇遠奮如追竄荷葉觸俱翻菱絲罥齊斷魚駭沒中
流鷗驚起前岸心踰隴雉驕氣壓場雞悍海客朝自驅
溪娃晚猶看稍欲礙行舟渾忘避流彈苦爭應為食幸
勝非因算微鳥昧全軀臨川獨成歎

言公井

寥寥武城宰遺井虞山陰千載汲未竭九仞功應深
蓺園自可灌道源誰復尋絃歌聽已歇瓶罍看還沈
無為

漂弗食惻惻起歎音一瓢樂未改庶幾回也心

弔幽獨君

君本何代人姓名復為誰何年棄人間長眠此山陲荆
榛鬱蒙籠孤墳上無碑游魂久未化哽咽還能詩人歿
乃歸滅憂樂豈復知君何獨煩冤猶有親愛思一死衆
所同已矣焉足悲陳辭為相弔此理君當推

靈巖寺響屨廊

君王厭絲竹鳴屨時清耳獨步六宮春香塵不曾起那

知未旋踵麋鹿遊遺址響沈明月中跡泯荒苔裏此夕
意誰過空廊有僧履

陪臨川公遊天池三十韻

羣山瞰笠澤勝覽兼曠奧曩遊務窮蒐甲乙誌曾到茲
峰最靈奇獨失有遺懊我公仙署居休沐偶得告林壑
軫遠情招攜逝同造出郭縱鞍輿入谷屏牙纛時當寒
冬晨嵐霧恣披冒幽幽霜泉微卷卷風葉燥尋溪見人
煙問嶺知佛號意行恐迷誤遠托樵子導居僧作蠻音

揖杖喜迎勞客來，豈先知定有山鬼報。始至已愜心塵，
念為除埽辟穹冠。玄雲池古貯清潦，長松挂其顛。美竹
蔭其隩，浮暉蕩空明。萬影鏡中倒，磷砢江頭石突起。類
爭暴，緬懷融結初。天巧亦多耗，探深識後返。升險戒前
噪，遠梅苦相邀。飛雪糝衣帽，谷猿晚應飢。澗鳥寒不噪，
欲歸更留憇。禪榻近茶竈，詩歌叢桂篇。琴奏猗蘭操，我
起前壽公樂哉。此高蹈及春幸，重來芹藻應可芼。何須
效羊公登峴，發嗟悼。世事舟陸行有力，孰比畧富貴不

可徵盍亦從所好斯理苟未宜山水解相傲微言儻或
然勿為俗士道

夜飲余左司宅得細字

春會非有期春愁本無際焉知君子堂此夕相與詣燈
銷月窺欄角警霜委砌舞影憐鶴長吟聲笑蠅細鄰雞
易催旦共歡休復寐喪亂得幽歡疇云匪良計

劉凝之騎牛圖

夫子初亦仕絃歌潁之湄園廬忽在念解綬言歸期方

春養孤犢既耕亦以騎春風草茫茫出遊徧山陂田家
有美酒輒醉不復疑當昔天聖間實號休明時豈無理
人術終懼塵鞅縻嗟今屬喪亂懷策競欲施清芬遠莫
挹載誦廬山詩

贈兒醫吳氏昆季

洗菊夜潭月斲苓秋塢雲偶因念殤者來此市人羣問
術或禽戲觀書皆鳥文誰知仙籍裏元有兩吳君

京口張氏世壽堂

天與下民壽各有百歲期行年不能滿人自傷折之雞
鳴晨闕開衆車起交馳茫茫欲海中神位那能知醲鮮
薦廣席妖妍貯深帷白日未及終紅英忽先萎春風北
邛原青草塚纍纍借問其下人得老還與誰翁家鶴谿
陽先朝業書詩一門四葉來俱聞享期頤世壽何獨能
世德尤不虧翁今眉生毫益以道自怡浮雲等飛煙昏
旦從變移不嚙華池漿寧餐古柏脂澄觀息內想心閒
自難哀一牀坐松陰風巾夕披披垂魚立侍側亦有白

髮兒嗟我生甚晚况復值亂離故老不復親猶及翁在
茲願言拜堂下聽說承平時

剡原九曲

其一

欲知溪流長百轉來越嶠舟行安能極嵐路入斜照清
景不足娛昔人豈辭詔石硯久難磨空林閉遺廟

其二

殿中初未仕高節振哀謝讀書在茲丘蕭然竹間舍王

來有深言留宿山水夜誰云南陽翁獨枉將軍駕

其三

山折水暫旋山開水仍往東陂匯初成秋色瀾然廣碧
蘿花茸茸月映石壁上何時試浴洄一理煙中舫

其四

密篠覆碕岸石穴黝而深居人負薪歸駐聽風水音回
看蓮花峰靄靄生夕陰不有僧鐘來高路誰能尋

其五

石洞篝火入石室敷牀居白雲開層巔上有丹霞書神
仙不遠人但使粗穢除何必瀛洲外茫茫問飈車

其六

危梁渡清瀨逶迤入前渚犬鳴樹蒙籠煙景暗墟聚雨
中耕叟歌月下歸人語欲尋仙尉蹤淒涼一茅宇

其七

清暉汎悠悠東與班溪合菱葉間荷花風來秋颭颭久
行愁寂寞忽有人煙雜我欲發棹謳漁郎肯相答

其八

俗駕不可到有地嶼中小迴迴別澗通宛宛連岡繞人
家林谷暗不見旭光曉東作起炊藜惟應候啼鳥

其九

入江水稍決霜降未可涉頗聞往來人出門即舟楫前
飛驚鷺遠下飲垂猿捷何處問興公風吹赤棠葉

詠殘燈

凝寒結重暈逼曙零孤朶膏空逐漏水焰在同爐火戀

影未成眠更就餘光坐

驅瘡

我生東海壖氣溼素善疔方暑忽遘疔未旬愧消羸俄
頃水火爭寒冰繼炎曦楚續甫謝挾齊紈遽尋持戰如
恐墜陷况若當遭炊向夕勢漸消臨風與清池旣去謂
遂息明午復如期俯仰天地寬無地竄眇軀思我到貧
病由是生爽噎豈伊水帝子遺威肆相欺會當濯滯昏
靈藥雜進施里閭習巫風磔鼠勸襍驅韓子蓋有託惟

能辨其詩

早過南湖

湖黑月未出蒹葭露淒淒榜人識浦澈不畏荒煙迷殘
夢詎可續舟搖櫓聲齊開篷望天邊斗柄插水低津遙
未見樹邨近纔聞雞自嗟遠遊人中宵走東西不如沙
頭鴈宛頸猶安棲

春日言懷

芳樹何靡靡鳴禽亦喈喈時物豈不好人事誠多乖憂

來卧閨房語笑孰與偕
天道諒不昧薄願終能諧
惟當守貞靜有酒陶中懷

題晚節堂

人生百年壽六十未為晚
胡為鑿玄扃結亭此山阪
周圍松櫟高可翫不可挽
日暮春雨晴黃鳥啼睨睨東家
鶴髮翁方置萬金產貽謀非不佳
竟為識者莞君能超物理生死若往返
一笑步松陰青山在吾眼

與客攜樂遊寶積山遂泛石湖

雲山擁春郭煙花漲晴川看花入山中諸峰恣攀緣客
吹玉管笙合以金柱絃清陰度碧嶂松風助冷然宛若
鸞鳳吟杳眇入紫煙行人盡矯首響遏雲中仙下山興
未闌相攜更登船虹收嶺外雨鳥沒湖中天嵐翠破夕
陽樓閣影倒懸酒傾綠脂膩鱸斫瓊絲鮮獨恨無紅妝
清波寫嬋娟微風吹帆緩欲使歸途延衆賓起歡呼船
返水漫舷回櫓掠寺過楊柳山門前此地有離宮美人
艷當年羅裙罷春舞草色餘芊綿況我昔此遊冠蓋十

里連重來復誰在新知滿中筵人事既若斯今古俱可
憐能遊即稱達何須問愚賢我欲叫馮夷捧月出海邊
醉後不歸去相照船中眠

謝陳卿惠冠

佳木產異域質理密且堅斲為野人冠我然著我顛故
人遠貽贈皎若瓊瑰鮮覽鏡見雅宜鄙姿忽成妍持報
乏金玉殷勤在斯篇

獨步登西丘

幽卧意不適出門聊獨行惻惻田野中斜徑多不平
逶迤登遠丘迢遞望高城風交二麥動煙迴孤花明
偶逢植杖翁疑是古耦耕欲問恐相訕歸來悵中情

茅氏高節樓

海上有高樓朱甍煥晨光清風自遠至吹動羅衣裳
樓中單棲人憂思起彷徨良匹已久歿自誓不再行
欲取哀琴彈仰見孤鴻翔孤鴻去何極撫景空歎息
感傷嬋娟客思作憔悴色憔悴非一時黃泉以為期
含情不能

道卿詠兩髦詩

閒理篋中得諸友詩存歿感懷悵然成詠

閒理亂帙中乃得故友篇顏色見遺翰瓊華尚清妍憶
昨遊名都結交此羣賢日枉貽贈詞情文藹相宣俛仰
未十周飄零若雲煙生者應白首死者俱黃泉屈指俱
別離羈愁獨江邊舊懷誰能識灑涕東風前

柳絮

輕盈易飄泊思逐春雲亂已拂武昌門還縈灞陵岸沙

頭雀啄墮水面魚吹散官樹曉茫茫哀歌腸欲斷

徐博士愛日堂

曜靈趣頽運忽去不待人壯者亦恐衰况乃頭白親心
長景苦短何由盡歡忻當朝慮遂夕在夜俄驚晨無繩
繫飛鳥使之少逡巡置酒上高堂為樂且及辰此日誠
可惜此意良難伸安得延年術為親保長春

答衍師見贈

衍師本儒生眉骨甚疎峭軒然出人羣快若擊霜鷄早

嘗垂長紳挾冊誦周邵欲陳興壞端往應乞言詔乾綱
會中頽四海起攘剽仰頭望天扃氛祲匿羲曜藩邦日
尋兵纁玉罷朝頽木顛豈繩維長往遂淪耀披緇別家
人欲挽首屢掉超哉休遠徒高躅願追紹初來北城剎
駐錫問宗要相逢共宵哦篝火樹間照篇成出叩鉢鋒
疾驚楚僇我或勸之冠不答但長笑留連忽中離名山
赴佳召頗知此行樂夙志酬歷眺吳峰戴襍登楚水投
文弔江秋雨鳴瀨海曙霞發嶠靈奇務窮蒐不憚躡遐

徼東歸始安禪幽谷斬蓬藿坐數雲中衾薜屋一澗繚
前年逐戎旃野出事田獠是時陰飈作山黑捲狂燒不
畏猛虎過車宿傍楓廟聞師隔煙嶺無寐聽猿叫晨興
雪滿壑衣溼寒木燎空林斷樵蹤兀兀見來轎相邀至
巖扉杉木穿窳窳深房煮山藥乾葉燄風鉋頓釋行旅
顏瓢綠欣飲醕促還不能淹喧寂歎殊調邇來竟何成
三十匪年少恨無闕弧力結束從嫖姚閒坊借書披危
坐似持釣行憂釜見奪謁恐冠遭溺逢人戒談時澀縮

刀在鞘軍聲五月急市粟無賤糶壯氣漸欲磨妻孥困
纏繞堂筵賓履疎暑夕行熠燿師來贈長句有譽無鄙
誚組章眩芬粦金奏聆要眇據梧起豪誦心疾渾可療
回顧平生吟真咽蚯蚓竅上天宰玄化亂治方叵料性
命如窮鱗儻獲脫曾爨卜居計已決不待龜灼焦過湖
就稻蟹靜處容不肖安能效羣女倚市鬪妍妙泳風或
鳴撓耕月還荷蓀師當重見尋東臯一舒嘯

謝周架閣移送菊花

杪秋始授衣我歸視南園荒逕久廢鉏舊菊今不蕃節
臨乏采翫何以慰憂煩東鄰幸分致離離擢深根幽馥
辭別圃佳色羅前軒愧無樹灌勞獲此英翹繁日出寒
意祛孤蝶來飛翻我亦愛其芳繞叢詠微言安得與君
子飲泛同一樽霜露懼遄殞歲宴空籬藩

送蕭隱君自句曲經吳歸維揚

適從江東來復作江北去來去逐江雲蕭蕭舊巾履身
帶煙蘿雨初下大茅峰孤帆拂楚樹遙聽廣陵鐘去家

忽來歸憐君似黃鶴日暮渺相思淮南桂花落



大全集卷五



總校官庶吉士臣張能照

校對官檢討臣蕭九成

膳錄貢生臣郭棣泰

欽定四庫全書薈要

集部

大全集卷八

六至



欽定四庫全書薈要卷一萬六千六百十七

集部

大全集卷六

明 高啟 撰

五言古詩

賦得真娘墓送蟾上人之虎丘

色相終壞滅佳人能久妍
斷碑山寺裏小塚竹林邊
蘭葉春風帶苔花暮雨鈿
情留吳苑客夢逐楚臺仙
高僧方宴坐身在散花天

友竹軒

世人務結託車馬紛交馳言笑雖強歡衷懷詎相知中
林有君子淡然夙與期虛心兩無阻榮悴焉可移朝尋
披煙逕暮對褰風帷非君此為偶誰共歲宴時

遷婁江寓館

寓形百年內行止固無端我生甫三九東西宜未諳去年宅
山陲今年徙江干野性崇儉陋經營唯苟完閒窻俯平疇幽
扉臨遠湍豈忘大厦居弗稱非所安披榛始來茲霜露淒以

寒誰云遠親愛弟子相與歡室中有名酒歲暮聊盤桓
雪夜懷周著作

燈照竹林雪寢齋寒更空窗間成獨坐遙想故人同不
有孤吟興寧度此宵中

登西城門

登城望神州風塵暗淮楚江山帶睥睨烽火接樓櫓并
吞何時休百骨易寸土向來禾黍地雨露長榛莽不見
征戰場那知邊人苦馬驚西風笳鳥散落日鼓鳴鳴城

下水流恨自今古

期家兄宿東湖民家不至

東湖欲上月寒鳥已棲煙何處相期宿柴門汀樹邊未
嘗新漉酒猶望遠來船誰信姜肱被今宵還獨眠

送陶兵曹之越

高齋掩林雪獨卧玄景暮夫君定何聞此日勞我顧清
言一歡然孰云昧平素方期締深約幽抱終以布胡為
遽嚴裝明發首東路手持三公檄新辟當遠赴薄祿豈

足羈知君為親故况茲句踐邦山水夙所慕湖明夕棹
來谷迴寒鐘度留滯自成悲無因共遊鶩

豐城余君夢彩堂

楚客身未歸悠悠念庭闈濤江雖云廣莫阻魂夜飛秋
陰天無星猿叫楓樹稀家山倏已到不失舊路微宛然
上高堂獻笑試舞衣焉知空館曙鐘動殘燈輝難追夢
中歡益發覺後唏誰能傳爾翼遠去成相依

過束氏廢園

人間樂事變池上高臺傾歌堂杏梁壞射圃菜畦成不
見妓釵影詎聞賓履聲來斯欲攄抱念昔反傷情

送倪雅

交遊結深歡離別生遠念聊持毛子檄暫脫劉生劍南
風柳下亭杯動江色灩山遙馬嘶驛日落蟬鳴店此去
漸成名驅馳君勿厭

同徐山人賁過妙蓮佛舍訪王主簿

逸人如高僧傲吏同隱尉閒房對清夏共挹池荷氣煙

帷棲鵠馴風鐸驚禽畏明日雨還來山櫻當熟未

題帶經漂麥二圖

朝鋤東臯土暮鋤西陂側釋耒讀遺經欣然此休息因
觀舜稷事耕稼寧辭力

田中刈麥罷把卷忘其疲風雨忽云至千穗漂無遺於
書苟有得歲晏何憂饑

秋日山中

山澤含霧雨偶來若居夷我無遠遊志何與親愛離暑

退初可喜秋來轉堪悲壯顏豈草木憔悴同此時中心
與百憂日暮如有期悄悄出空宇悠悠適荒陂
復歎天欲昌吾詩

宿幻住棲雲堂

窗白鳥聲曉殘鐘度谿水此時幽夢迴獨在空山裏松
巖留佛燈葉地響僧履余心方正寂無使羣動起

送賈鳳進士

新逢洛陽客握手共遊般如何異鄉土乃得此交歡相

逢既不易相違亦良難驅馬夕云返北風野多寒登高
望山川浮雲杳漫漫羣獸相號呼哀音摧心肝遊子念
高堂歲晚身得安人生如蓬萍飄流無定端重合諒有
日長歌聊自寬

寄王七孝廉乞貓

鼠類固甚繁家有偏狡獠厥質亦陋微朋聚工造怪舞
庭欲呈妖憑社期免敗饒同善飯頗暴比橫行噲倉偷
自詫肥穴竄寧辭隘唯思淮南舉不悟河東戒嗟余守

窮僻有屋如敝廨公然肆相欺遠告來別界嚶嚶鳴橐
頻窳窳緣幙快伺暗忌燈然聞腥喜餐餲空牀印凝塵
高壁墮墮塊核遺槃果亡汁覆罌齏壞車輶駭怒關急
雨疑流嘑書殘費補裝裊浣煩烘曬入廁客驚吁守舍
奴憂誠豈無老烏圓昔壯今何憊不修司捕職垂頭象
瘠賸難求許邁符莫具張湯械尋蹊漫設機薰隧徒吹
韞遂令不眠人中夜長抑噫君家產銜蟬許贈不以賣
願得縱驅擒淨若刈菅薙盡殺豈匪仁去害容少懈高

枕幸無苦君惠當再拜

送客之海上得誠字

卧廢困田子抱闕老侯生豈無一時辱終有千載名子
亦屈身者薄祿非所榮結歡誰云淺一杯吐衷誠艱難
我何托所托在友朋平生不傷離此離骨為驚白日川
上沒歌作變徵聲明朝欲觀海浩蕩逐東征

冬至夜坐懷周記室

夜聞驚鴻來一室寒且靜明朝日長至夜漏方最永淒

淒霜塗階皎皎冰入井故人昔同宿杯酒笑相領年運
方重周歡事忽盡屏別離孰無有爾獨限殊境達曙恨
難裁殘燈兀孤影

賦永上人紙帳

剡藤裁素幬坐使諸塵隔冬室自生溫寒窗屢驚白不
隨直省被長覆棲禪簣思曾雪夜時宿伴山中客

初開北窗晚酌

時寓江上外
舅周隱君宅

春暄罷淒風朝始開北牖青山入吾座不異延故友自

掃榻上塵琴冊列左右悠然坐其間傲兀醉杯酒况當
江花落微雨斜日後遠見帆度川高聞鳥鳴柳孰云非
吾廬居止亦可久人生處一席累榭復何有幽懷悟澹
泊末事辭紛揉更擬長夏眠風期結陶叟

夏日與高廉遊無量佛院還憩王隱君池上

久卧困炎燠煩抱思一浣霽雨留暫涼言出欣子伴悠
悠去景得稍稍來迹斷已尋名僧廬復謁高士館蒲荷
共南風池上新葉滿步陰覺衣輕汲冷嫌綆短幸無塵

中役樂此林下款鳴蜩嘒斜陽歸駕猶可緩

曉起春望

今朝有春意原野晴始綠疎花未破煙新禽稍鳴旭物
情各欣榮客意胡刺促居間厭寂寞從士愁羈束兩事
不可齊人生苦難足安得長放歌花開酒醅熟

陳氏秋容軒

西郊莽迢遞川樹凝煙景雨過落紅蕖斜陽半江冷蟬
鳴山欲暗鴈去天逾永孤客對蕭條應嗟鏡中影

瞻木軒

道士李玄修所居庭有凌霄花依樹而生近樹
伐而凌霄獨存因以名室求予賦詩

凌霄託高樹引蔓日已長纏綿共春榮幽花藹敷芳高
樹忽見伐無依向風霜亭亭還自持柔姿喜能強君子
貴獨立倚附非端良覽物成感歎為君賦新章

雨中遣興

積雨坐無悶端由便寂寞好鳥不頻啼閒花自遲落行

園每度徑望岫時登閣只此可終朝何當有樽酌

題方厓師聽秋軒

西澗獨趺處涼颼度虛閣秋從夜深來流音滿林壑初
鳴忽澎湃稍定還蕭索月下暗禽翻窗間危葉落上人
習靜定談籟笑南郭喧寂兩無聞星河在寥廓

與內兄周思齊思義同過僧浩西齋夜酌

雨過月在花疎鐘閉禪舍幽僧與逸人對酌明燈下園
樹稍辭春池蛙正鳴夜嘉會莫蹉跎流年易傾謝

萱草

不見堂上親
空樹堂下草
夏來風雨繁
離披數叢老
日暮欲忘憂
塞芳轉傷抱

月林清影

疎林逗明月
散亂成清影
流藻舞波寒
驚蚪翔壑冷
雲來稍欲翳
風動紛難整
圓魄忽西傾
愁看墮空境

春草堂

靡靡堂廡草
託根近華楹
膏露旣灌芳
惠風亦揚馨
匪

蒙陽和力孰使微物榮中天駛景流青節坐易盈但憂
德澤違豈惜憔悴并願言相蔓結遮彼春逝程寸心雖
難報拔去還當生

次韻內弟周思敬秋夜同飲白蓮寺池上

月出露已白荷花香滿池高僧愛清夜留客坐題詩竹
動鳥驚夢草涼蟲語悲閒齋一瓢酒應不負幽期

聞鐘

迢迢煙際發隱隱巖中應初來覺寺遙乍歇看山暝惆

帳未眠人空齋幾迴聽

詠雨酬張進士羽見寄

珠碎復絛輕颺迴乍拂楹望中來曉峽愁裏度秋城莎
溼蛩應冷荷響鷺還驚聽絃知瑟潤卧簟覺幃清一覽
停雲句離抱轉難平

徐隱君陋居

脩途息往駕環堵老所依蕭條窮巷中故人亦來稀交
交風雨侵翳翳蓬藿圍局促不苟厭暫出復來歸名都

列飛甍煥耀朝日輝爽塏豈不慕終憂蹈危機心舒體
自適道在願無違茲焉樂飲水回賢良可希

西園曉霽

積雨淹夏半始晴園景饒高林上初日遠水泛迴颺餘
情萱際蝶新響樹間蛭詎必勞觴詠煩憂坐已銷

題畫鷹得嘯字

高風動古壁竦立見蒼鷁軒然欲飛揚嗟此粉墨妙秋
筋束老骨天寒勢逾矯腦枯草中兔氣盡檻上驃健鶻

雖百餘凡材豈同調乾坤正肅殺怒氣號萬竅大野開
平蕪悲臺落殘照荒城有妖狐夜作猛虎嘯為君試一
擊壯士慙勇剽安能飽拳肉側翅隨年少

哭王隅

車行一輪摧鳥奮一翼傷人生失輔友誰當共提將相
逢豈無人不獲如子良朝遊羣彥林夕棄萬鬼鄉春風
吹南原百草萋以長呼君不歸魂割我欲斷腸豈不悟
生滅情至諒難忘

池上晚憇

春晚思悠悠閣前池水流
新蒲風葉響如對野塘秋
野塘前歲路已隔歸舟度
鳥下獨回頭青山杳然暮

醉歸夜醒聞雨

覺來聞雨聲燈輝耿殘夜
窗間有危葉暗助瀟瀟下
不記醉歸時寢齋如客舍

夏夜起行西園

夜熱不能寐起步中庭前
舉頭望高旻離離衆星躔
欲

推理亂象天道幽且玄長歌來涼颺驚鳥北林顛此時
層城閉悄悄萬室眠誰復相與娛淡月孤光懸

師子林池上觀魚

穿蒲尾獨掉唼鱗口羣仰波平沒見痕池靜跳聞響漁
人已免捕僧盂每分養落日意無驚識我臨流賞

和張羽懷吳興舊遊之作效其體

城貫綠川長朱閣暎飛梁鶯嬌山唱度蓮豔水嬉張花
童搦翠管桑婦挈銀筐若谿酒脂碧顧渚茗旗香擇勝

事未厭驚亂意俄傷回看舊遊地秋草變淒涼

送沈徵士鉉歸海上

我友張國士短若婁君卿家無一金產所結皆豪英去
年東方來向我道爾名相逢真甚都座客為之傾高標
華月出雄辨流泉崩時方尚權謀處士皆振纓諸侯致
幣聘公子將車迎爾獨念滄洲扁舟問歸程翩翩冥飛
鴻影過海上城儻見魯連子殷勤煩寄聲

重午書事

采蒲臨綠波團扇送涼過越客爭標渡荆巫弭節歌家
醕憐浮玉宮衣憶賜羅今年兵氣惡朱符佩更多

東白軒

昔宿東峰顛長夜何曼曼起看玄景晦冰雪積未泮翻
翻驚濤瀾黝黝失星漢悲風吹木石澎湃而凌亂太陽
淪朱光陰火吐微煥山精與罔象乘暗出遊翫前巖挂
猴猱後嶺起鴉鵲一時互號叫哀厲客腸斷芒芒禹九
州下視莫能判如身墮幽都涉水濟無畔金烏在地底

其出疑可喚雄雞棲高樹凍噤不振翰君家有層軒不
異泰山觀扶桑拂檐楹咫尺海東岸酒醒四鼓發暘谷
已昇半紛紛物象出稍稍涼暄換如盲得復明毫末皆
可看山中舊所聞寂默應屏竈何當此借榻夙興不待
盥共賓義和車一觀天下旦

賦得姑蘇臺送賈文學麒

城上聞啼鴉臺前見遊鹿悠悠畫簾影薄暮澄潭曲雲
隨歌舞散日與興亡促美人不歸來湖水春更綠思君

別後登應盡天涯目

聞晚鶯

時在園城中

昨歲聞孤嘯綠陰山院行今朝寢齋雨重聽獨含情西
澗多喬木何為亦到城

西齋池上三詠

葵花

豔發朱光裏叢依綠蔭邊夕同山薜落午竝海榴燃幽
馥流珍簾鮮輝照藻筵羣芳已謝賞孤植轉成憐

荷葉

楚服新裁得吳冠舊製成圓應間荇菜密欲翳蓮莖聲
中亂雨至陰下一魚行桂棹還思折江南日暮情

桐樹

晴粉朝英墜涼瓊夏葉舒鳥啼高樹早蟾囀薄疏虛朱
弦未薦曲彤管屢題詩坐恐銷華澤商吹起前除

遊城西得艷字

軍旗表山柵商鼓喚津店稻黃雲有香楓赤火無焰賞

懷誓飲償眊目擬窮占思畋已繁
昭欲賦更橫槩煙開
象極判波溢類洪墊壞宮茨被垣
棄壘葑漫塹晨唳鷗
鴻多秋腥鱸蟹贍吼鯨報僧粥卧
獸衛官寔揖道訛語
談映離陋妝覘池開沐女盆石拔
關夫劒竿危闌鈴響
紗古冪燈艷時艱遊總稀歲稔酤
饒釀探囊出奇蒐抨
努脫浮念一覽一興嗟再到再忘
厭吟將嘯援賡歸用
棲鵲驗壑虛哀商叩嶺豁初魄閃
官官聽鳴鐘翩翩戒
還轡興清逼林淒醉纈眩湖灩顧
標山已違入郭塵復

染幽景慮遂逋拙詞紀姑僭

卞將軍墓

胡馬飲洛川皇輿寓江左宰輔失良圖國門屢興禍惡
木不可植猛獸終難馴冠軍歷陽來白日飛黃塵兵叩
西陵關火焚大桁口虎旅方敗奔六宮竟誰守卞公仗
戎鉞勇氣超常倫立朝素正色臨難仍捐身落日百戰
餘裹創領殘卒父子誓除兇一朝共淪歿當年尚浮虛
風俗變縉紳誰知効節者不在清談人石頭義旗來天

狼夜流血冊贈極哀榮千秋表忠烈六朝卿相塚無數
青山根至今行人過但拜將軍墳馬鬣封未平龍泉氣
猶發惆悵望松楸一杯奠寒月

綠水園宴集

平居寡良會艱哉況茲時幸逢金閨英中筵接光儀名
園過修禊景麗春陽熙綠芷榮曲沼朱華敷廣墀情宣
寄高文憂襟為之披觴來不敢訴慮此朋歡虧何以淹
返旆頽光願遲遲

答宋南宮見寄

時寓江上

棲寓豈高遁偶家南渚濱雖欣遠物累終悲寡交親
舟近入郭言欲訪故人叩門予不在思懷竟難伸
歸來掩蓬廬幽卧屬始春風暄柳意動雪霽禽聲新
孤遊盼芳物尊酌孰與陳念昔文翰場弱蹤繼清塵
鳴絃東閣夜飛蓋西園晨茲歡與年徂憔悴兩未振
朝蒙枉瓊藻慰我佇慕勤深情寄妍詞不殊握中珍
居屯在守志養素豈辭貧裁章以少答此道願無淪

夢梅堂

寢齋掩殘雪幽幔燈微皎不知南澗濱魂與春縈繞初
迷月入樹忽斷風驚篠餘韻悵難尋空山鶴鳴曉

送程校理遊江上

風亭裊離管草綠江水暮送此南浦人孤帆雨中渡別
傷足自緩前驛花滿路春叢戀山鷺晚絮迷汀鷺我今
獨愁居芳月誰與度佇立望遙波相思積煙霧

僧齋聞雨

寂寂初罷語悠悠未成眠高齋有春雨夜半落燈前已
傷花委樹復念水盈田老衲獨無聽繩牀方坐禪

懷徐七

哀鴻已鳴渚落葉初覆陌故園當授衣却思遠行客客
行日已遠我思日已積東南望歸棹鳥去煙波夕憂來
不成言滿抱空戚戚豈無一尊酒黃花為誰摘

四柏

堂前四小柏羅立二尺長始栽附南墀遠移自東岡春

夏衆草芳翳沒成久荒低枝網蟲縣暗葉螻蟻藏不沾
夕露氣每隔朝陽光我病廢芟理覽之屢彷徨玄冬戒
嚴候迅風激飛霜蕪穢忽自除鬱然露蒼蒼恍若羣梟
散鵷雛得翱翔乃知受命正雖弱自可強循步賞勁色
撫攀挹微香幸得依我居勿令縱牛羊他年培養成凌
雲孰能量後彫誠足貴早厄庸何傷

西臺慟哭詩

越人謝翱嘗為宋丞相文山公之客公死之十

二年登釣臺祭公以哭自為文識其哀曰西臺
慟哭記東陽張孟兼持示求詩僕感其誼遂賦一

首

我我子陵臺其下大江奔何人此登高慟哭白日昏哀
哉宋遺臣舊客丞相門丞相既死節有身恥空存北望
萬里天再拜奠酒尊陰雲暮飛來恍如載忠魂所哭豈
窮途中抱千古冤上悲宗周隕下念國士恩淒涼當世
事感慨平生言空山誰知哀惟有猴與猿豈不畏衆驚

聲發不忍吞人言天有耳此哭寧不聞願因長風還吹
此血淚痕往墮燕山隅一灑宿草根田橫去已遠茲道
不復論作歌悼往事庶使薄俗敦

見耕者

茲晨有佳興挈杖行遠墟春犁稍已出土脉向煖舒嚶
嚶鳥轉谷瀏瀏泉鳴渠歲功自茲始為農亦良勗而我
情四體偃息在弊廬飢匱固當爾無為歎踟躕

雨中書湖上漁家壁

漁舍煙不起瀟瀟雨初暝孤客與羣鷗寒依葦間聽山
昏望易失波動愁難定歸思滿蒼茫空憐去帆迴

同杜二進士晚登潘氏樓

靄靄川樹暝夕陽忽然收林間一鐘來隴上衆未休維
榜漁石邊尋我棲寓儔本期散憂懷攜手登此樓那知
見遠色蒼茫轉成愁幸茲有尊酌雖晚為君留

送家兄西遷

昔別歸有期此別去何極西遷屬事變咎責非已得家

貧無行資空橐辭故國匆匆逐徒旅宛宛謝親識牽攀
不能留慟哭野水側離鴻為迴翔浮雲暮愁色別時雖
云苦未若別後憶願行勿憂家養親自我職殊方氣候
異炎霧秋未息委命毋怨尤長年強餐食

至蓮邨

昔愛茲里幽誓將構蓬廬孰云墮世網重到十載餘喪
亂喜獨完煙火靄舊墟柴門在深巷落日榆柳疎鄰翁
念契濶攜筐饋雙魚苦問客何事顏色與昔殊焉知涉

艱難多戚長少娛貧賤非所恥中情在閒居願翁勿相
誚終當遂吾初

雨中登白蓮閣望故園

亭亭高閣上渺渺清川曲日暮靄羈愁薜蘅雨中綠聞
鐘僧已返荷笠人猶牧歸棹獨難尋江南望雲木

尋照公

遠尋林下僧不識林下路隔雲孤磬響因到繡經處相
對竟忘言夕陽在祇樹

江上過丁校書宅留飲

迂櫂入浦汭言尋故人扉
鷄鳴邨樹煙寒旭景尚微
子起罷理髮相延闕中闌
雅詞旣云宣濁醑亦以揮
幸茲竟日歡一浣積慮非
尚慙有羈牽暫會復遠違
臨流送我還迴颿夕吹衣
亂來人情改高誼似予希
儻不終憚煩卜鄰遂相依

遊靈巖賦得越來谿

越女遊未去越兵嗟已來
青山舊谿上無復見樓臺
過

客空惆悵荷花秋自開

立春前一日喜雪

一冬纔見瑞三白詎須頻未嫌遲送臘唯憐預占春積
砌猶殘凍妝苑已芳辰留更明朝落梅花欲鬪新

移家江上別城東故居

人情戀故鄉誰樂遠為客我行豈得已實為喪亂迫淒
淒顧丘隴悄悄別親戚不去畏憂虞欲去念離隔雖有
妻子從我恨終不釋出門未忍發惆悵至日夕

雨中客僧舍

客夢方暫適竹間風雨驚起登林端閣迢遞望層城景
寒川樹疎野晦原煙平不邀釋子語何以緩羈情

見花憶亡女書

中女我所憐六歲自抱持懷中看哺果膝上教誦詩晨
起學姊妝鏡臺強臨窺稍知愛羅綺家貧未能為嗟我
久失意雨雪走路歧暮歸見歡迎憂懷每成怡如何屬
疾朝復值事變時聞驚遽沈殞藥餌不得施倉黃具薄

棺哭送向遠陂茫茫已難尋惻惻猶苦悲却思去年春
花開舊園池牽我樹下行令我折好枝今年花復開客
居遠江湄家全爾獨歿看花淚空垂一觴不自慰夕幔
風淒其

東陂路上阻水

不覺去邨遠瀟瀟柳間步江雨夜來多春流稍侵路塞
裳自可涉不待漁舟渡

獨酌

白日下遠川寒風振高柯蕭條掩關卧暮雀忽已過我
有羈旅愁鬱如抱沈疴起坐呼清尊獨飲還獨歌一斟
解物累再酌迴天和數觴竟復醺翻恨愁無多所以古
達士但飲不顧他回頭向婦笑戚戚終如何

同杜徵士寅過南渚赴朱七丈招飲

五月燕雛飛絲成桑葉稀相逢總羈旅白苧未縫衣扁
舟喜同載晚渡滄洲外樹失潮氣昏沙喧雨聲大將迷
路却通窈窕復蒙籠果熟皆梅子禽啼盡郭公兵戈苦

未息莫歎猶為客此去醉誰家江邊主人宅

始聞夏蟬

翩翩纔得蛻咽咽未成喧翳葉誰能見南風綠繞軒乍
驚變節物還念別郊園何待當秋聽方令羈思繁

贈斲苓者

山田不生苗零雨空溉之歲晏窮谷中何以療我飢青
青萬丈松兔絲絡其枝不知何樹下乃有千年脂朝行
西澗濱暮行東岡陞荷鋤偶遠樵言尋亦良疲鑿彼土

石間得此瓊瑤姿香因清飈發色藉玄泉滋嘗讀炎帝
編徵功實多竒天和滌煩滯靈味扶殘衰詎必勞悲歌
去采商顏芝歸來拾荆薪炊之作晨糜八珍豈不美素
餐懼可嗤服斯待輕舉往與仙人期

我昔

我昔在家日有樂不自知及茲出門遊始復思往時貧
賤為客難寢食不獲宜異鄉寡儔侶童僕相擁持天性
本至慵強使賦載馳發言恐有忤蹈足慮近危人生貴

安逸壯遊亦奚為何當謝斯役歸守東岡陂

將往海上舟行值雨投僧舍

沙響聞雨來中途生旅愁遙尋晚林磬暫駐寒塘舟窗
下一僧老竹間諸鳥幽誰言阻遠去翻使得佳遊

暫歸鳴珂里舊宅

故廬在東里久出喜偶旋景物亂後非行觀一悽然荒
榛塞園逕流塵蔽堂筵念茲經營初勤苦唯我先蕪穰
棄弗守顧已誠有愆雖懷首丘願未絕遊方緣是主乃

如客暫來靡留連日暮復遠去哀抱將何宣

江上晚晴

江虹斷雨脚返景明墟里宿鳥亂歸邨幽人獨臨水漁
舟隔浦飯煙火蘆中起閒吟望遠岑緩步尋芳芷此夕
遇新晴憂懷偶然喜

與王隱君宿寧真道館

松下禮真罷鶴鳴暮壇空偶來古仙居欣與靜者同玄
言不知還遂宿琳館中蒸茵沃芳露焚蘭度微風山瓢

瀉未盡月出秋林東語化衆妙歸探元萬緣窮不與至
道俱何以超妄蒙願從希夷遊稽首青牛翁

送珪上人

曾來看江雨同倚香臺上師今西去遙還上香臺望淮
山暮鐘起楚水春帆漾來去本隨緣分攜莫惆悵

冒雨暮歸過白沙湖

天寒滿湖雨獨棹東歸急遙望水邊邨蕭條暮煙溼家
人應候我深暎柴局立

送袁憲史由湖廣調福建

只謂遠遊苦寧知遠遊樂君今萬里歸顏色殊不惡自
言楚帆開初別鳳凰臺采石月下過匡廬天際來試沽
彭澤酒憔悴陶家柳最愛小姑妍臨行復回首遠逐繡
衣遊閣登黃鶴樓千峰漢陽晚一鴈洞庭秋西上荆門
渚銀釵見巴女歌斷竹枝詞江陵夜風雨看盡幾多山
今朝始得還秋風吹驛騎又欲度閩關閩關聞更好瘴
霧晨收早椰子美如漿蘭花多似草嗟余戀故鄉不肯

涉津梁把酒看君去相思空斷腸

宴顧使君東亭隔簾觀竹下舞妓

美人竹下舞醉看隔簾櫳彷彿瑤臺子遊戲綠雲中玉
鈎正蕩月羅袖忽驚風莫逐青鸞去尊前樂未終

夢遊仙

夢騎蒼麒麟手持白玉鞭長風八萬里夜入通明天正
逢絳闕開謁帝陪羣仙飄飄紫霞珮杳靄青霓旃命與
衛叔卿共讀金藥篇玄文不可識謫歸一十年驚寤忽

長歎虛空但雲煙

獨遊白蓮寺池上看雨

輕衣忽變冷池雨來清夏圖文細細生密響脩脩下荷
披魚躍起樹靜禽鳴罷賞淡自忘還非因與僧話

贈薛相士

至正辛丑嘉禾薛月
鑑過予求詩因贈

我少喜功名輕事勇且狂顧影每自竒磊落七尺長要
將二三策為君致時康公卿可俯拾豈數尚書郎回頭
幾何年突兀漸老蒼始圖竟無成艱險嗟備嘗歸來省

昨非我耕婦自桑擊木野田間高歌誦虞唐薛生遠拏
舟訪我南渚旁自言解相人視予難久藏腦後骨已隆
眉間氣初黃我起前謝生弛弓懶復張請看近時人躍
馬富貴場非才冒權寵須臾竟披猖鼎食復鼎烹主父
世共傷安居保常分為計豈不良願生毋多言妄念吾
已忘

大全集卷六

欽定四庫全書薈要卷一萬六千六百十八

集部

大全集卷七

明 高啟 撰

五言古詩

曉卧丁校書西軒

窻月淡欲失朧朧逼初曙屋外鳥聲多應知有嘉樹殘
香掩幽寢末事澄紛慮頗似宿東巖僧齋竹深處

水上盥手

盥手愛春水水香手應綠
汙汙細浪起杳杳驚魚伏
悵坐沙邊流花去難掬

贈漫客

畸人誠達生聲叟亦曠士
漫客乃其徒放意在雲水
有山即漫游有竹仍漫止
漫吟不求工漫飲不須美
與物無留情所適皆漫爾
人生本漫寄何事紛戚喜
與子作漫交逍遙論茲理

晝睡甚適覺而有作

閒居况懶拙盡日無營為掩室聊自眠一榻委四肢向
暄思益昏南窗滿晴曦吾神誰能繫八表從所之殷憂
常苦縈茲焉忽如遺有身不自省此外安得知覺來鄰
鷄鳴已過亭午時如遊釣天還至樂不可追我意在有
適寧顧朽木嗤猶勝夸毗子塵中爭走馳

秋日端居

秋意日蕭索郊園霜露餘出遊無山水聊復守吾廬巷
轍久已斷山瓢仍屢虛非甘寂寞者誰樂此閒居

夢鍾離兩兄

淮水去不絕淮山與偕馳
鍾離兩遷客路遠歸何期
孰云歸無期此夕乃見之
握手說辛苦杯觴復同持
須臾忽驚別我夢方自知
雖夢亦足喜况乃歸來時

雨中留徐七賁

江寒宿雨在落葉滿村溼
留君繫君艇莫犯風潮急
試問欲歸城誰家借蓑笠

看刈禾

農工亦云勞此日始告成往獲安可後相催及秋晴父
子俱在田札札鏹有聲黃雲漸收盡曠望空郊平日入
負擔歸謳歌道中行鳥雀亦羣喜下啄飛且鳴今年幸
稍豐私廩各已盈如何有貧婦拾穗猶惛惛

晚步遊褚家竹潭

落日猶半野閒來潭上遊非因戀幽賞聊欲散煩憂澄
波魚噉夕荒竹鳥吟秋不是愚溪上胡為吾久留

召修元史將赴京師別內

承詔趣嚴駕晨當赴京師佳徵豈不榮獨念與子辭子
自歸我家貧賤久共之閨門藹情懽寵德不以姿天寒
室仍罄何忍遠去茲王明待細文不暇顧我私息息愧
子勤為我烹伏雌攜幼送我泣問我旋軫時行路亦已
遙浮雲蔽川坻宴安聖所戒胡為守蓬茨我志願禪國
有遂幸在斯加餐待後晤勿作悄悄思

早發土橋

空山遠無驛逆旅聊可宿懷征候鳴雞燃帶續我燭僕夫昨

行苦爛慢睡正熟呼之愧息息推車出茅屋高巖尚懸斗深
谷未升旭欲亟去反遲怪石暗屢觸思當在家樂日宴始
舒足胡為此行邁霜露勞局促王事靡敢辭非關狗微祿

車過八岡

上岡如登天下岡如決川勞哉挽車夫呀喘當我前兩
轆轤欲推土石厲且堅我行閔其憊時下息彼肩雖非
古羊腸實懼覆與顛如何道路子車來競連連白日已
傾仄我行尚迴遄安得駕逸足平野超飛煙

寓天界寺雨中登西閣

片雲出鍾山陰滿江東曉幽人閣上寒風雨啼鴛少紅
塵禁陌淨綠樹層城繞不為怨春徂離懷自憂悄

送陳四秀才還吳

君是故鄉人同作他鄉住同來不同返惆悵臨分處手
把長干花回望長洲樹恐起憶家心愁題送君句

送聯書記東歸

旅寓古寺間得與名僧居時因簡牘暇共諦楞伽書倚

閣山暝後步廊月生初屢聞真詮妙一使羈縻舒茲晨
別同袍言旋舊精廬飛雲自無滯愧我焉能如東浦秋
正遙西齋夜應虛傷離固知妄相送聊踟蹰

送禮部傅侍郎赴浙西按察

聖主想賢哲夫君歛來東姓名簡睿聽召對明廷中彷彿似其先夢寐相感通秉綸坐西掖曳履遊南宮復輟
要近居住試澄清功糾郡握使節炎天凜霜風顧余謬
珥筆言笑獲屢同無端此分袂離抱何忡忡

對園柳

依依客園柳來時未堪折
今看夏條長上有新蟬咽芳
序惜推遷佳人念離別秋風
莫遽起旅思方騷屑

僕至得二女消息

我僕持尺書來自我故鄉讀書意未了
呼僕問彼詳云我兩小女別來稍已長大
女手摻摻窗前學縫裳小女啼啞啞走索
瓜果嘗喜爺有使歸迎門各踉蹌我坐聽
此言欲慰意反傷稍近尚爾思更遠何能忘

菊鄰

菊本君子花幽姿可相親
清秋發孤艷似避東風塵
采霜露餘繁英正鮮新
車馬不過賞相看但幽人
幽人苦愛菊自是柴桑倫
閒園誰與語叢栽四為鄰
入徑朝摘遠循籬暮觀頻
一壺每對酌折花插盈巾
殊勝處俗里歌呼醉遭嗔

出城東見古松流水坐憩久之

空潭寒無藻瑩淨涵青天
長松百餘株扶疎繞潭邊
我

行值幽境坐賞忘歸旋清風似相娛西來忽溼然水動
松亦鳴紛披復淪連羣鷗盡驚矯疑是龍吟淵微瀾蕩
餘暉流響散遠煙靜聽意已消何須撫微絃安得卜此
居一謝塵中緣朝來潭上坐暮向松間眠

夜坐天界西軒

明月出東閣照我坐前軒諸僧夜已定寂寞與誰言煙
慢螢微度風條蟬罷喧清景雖堪悅終嗟非故園

京師嘗吳粳

新杭粲如玉遠漕來中吳初嘗愛精粲想出官田租我
本東臯民少年習耕鋤霜天萬穗熟恣啄從飢烏日暮
刈穫歸妻孥共歡呼茅屋夜春急風雨江村孤晨炊滿
家香薦以出網鱸如今幸蒙恩遨遊在南都門前半區
田別來想已蕪長年盜寸廩補報一事無投匕忽歎息
飽食慙農夫

為因師題松梢飛瀑圖

松風散飛瀑夜作濤聲急棲鶻起空山如驚鬼神入定

僧寂無聽任灑袈裟溼

送周四孝廉後酒醒夜聞鴈聲

別時酒忽醒客去唯空舍風雪鴈聲來寒生石城夜遙
憶渡江船正泊楓林下

答內寄

落月入曉閨相思不須啼我非秋胡子君豈蘇秦妻風
從故鄉來吹詩達京縣讀之見君心寧徒見君面拔草
不易絕割水終難開行雲會有時飛下巫陽臺莫信長

安道花枝滿樓好白馬繫春風離愁坐將老

真氏女

余在史館日談次有言姚文公承旨翰林時嘗
飲玉堂有侍妓閩語者詢之乃真文忠公裔孫
也父為筦庫負縣官錢鬻之以償遂流于娼家
公愍之白于執政落其籍以嫁院吏黃逮逮後
至顯官同館之士聞之多賦詩者余亦為作一

首

妾恨非緹縈上書動天子自鬻償縣官幸得脫父死誰
知故相家失身居狹斜遂令園中柏翻作道傍花當筵
唱金縷朔客驚聞語相問忽相憐開籠放鸚鵡棄置舞
衣裳新理嫁時裝良人身作吏不是販茶商花釵映羅
扇初與郎相見貴賤古難常妾心那敢怨願郎去作官
莫掌官錢穀生子但生男家門免多辱

送李架閣赴山西行省

日暮踰大河北望古晉疆萬里饒風沙地接戎與羌翩

翩并州兒躍馬能挽強古來事爭奪百戰在此場聖皇
剗羣雄撫劍定八荒睠茲形勝都建侯樹藩方披榛開
幙府賓從皆才良所期偃甲兵民物自此康山河罷阻
險沃野多耕桑君行願努力遠別庸何傷

送王哲判官之上黨

羣材萃京師有若奔海川盍簪向華館唯君最韶年忽
行佐名邦輟理金匱編朝辭紫闕下暮宿黃河壩馬上
看太行日落萬里煙我我天井關高城鬱相連遺氓得

少安時清罷戈鋌亟行勿憚遠聖意煩承宣

登句容僧伽塔望茅山

高登大士塔遙望仙人峰茲峰夫何如玉削三芙蓉雲
深句曲樹日落華陽鐘長君昔飛昇駕挾雙白龍至今
學道處洞府留靈蹤丹泉夜吐光瑤草春含茸仙應笑
我愚塵世苟自容胡不鍊爾形歸來蔭長松望仙咫尺
間不隔雲海重真訣儻肯授執鞭願相從

贈楊榮陽

嘉陵美山水亦復富文彥楊君產其邦材拔性高狷布
衣走名都早入藝林選客屈稷下談王邀鄴中宴出門
得名聲不假親舊援匣劒未久埋囊錐已先見吐詞實
瑰奇讀者心欲顫刀鳴鬪夫勇花妥笑女倩如觀廣場
中百戲張曼衍平生眼無人遇我獨相善陌頭每竝出
兩騎無後先喜從兔園遊慙受狗監薦君歌我固服我
賦君亦羨墮筵吟帽烏踏席舞裙茜醉中共笑語往往
雜諧諺有時出城西山水恣攀踐巖眠曙猿驚澗飲夏

鶯囀吳宮妓去榭蕭寺僧開殿龍門剝陰苔高什記題
徧歡遊正相酣世事忽驚變朋儔半生死一往如激電
我棹返江潯君車赴淮甸旋聞逐流人居濠又移汴一
身去何賫空索唯破硯危塗晚行疲欲進足如冒狼來
樹杪避蝸走燈下見渡河自撐篙水急船斷牽及至秋
已深舊褐風裂片難尋高陽飲空弔鄢陵戰聖恩忽加
憐收拔佐山縣卑曹敢云辭執版謁府掾官庖盡炊藜
民賦半輸絹低飛蓬蒿間不異雉帶箭有親寓京師年

老闕供饌欲奉朝夕歡去職胡敢擅晨上宰相書得歸
遂微願上堂具珍鮭呼婦賣釵釧我時別君久問訊愧
無便空題憶君詩細字書滿卷今春被詔起前史預編
撰始來長干門楊柳正飛燕逢君風塵餘不改舊顏面
握手話苦辛悲喜雜慶唁客中雖無錢自寫賒酒券邀
來卧東閣月出初鎖院君言涉艱難壯志今已倦回頭
悟前非更名慕蘧瑗君近改名去非我聞棠谿金不畏經百鍊
胡為暫失路遽欲老貧賤吾皇奮神武四海始安奠棧

通諭夷文驛走徵士傳時巡抗霓旌肆覲冠星弁功成
萬瑞集禮欲議封禪君才適時需正若當暑扇手持照
國珠胸出補袞線便應上金鑾立對被天眷嗟余忝載
筆鼠璞難自銜幸茲際昌辰魏闕寧不戀但憂誤蒙恩
不稱終冒譴秋風楚潮滿歸舸帆欲轉君若念故交殷
勤一相餞

寺中早秋

秋風入寺早孤客驚離索斜日數蟲懸槐花雨餘落砧

聲起廢苑簾色淒高閣獨憐明鏡中玄鬢猶如昨

天界翫月

洪武二年八月十三日元史成中書表進詔賜
纂修之士一十六人銀幣且引對獎諭擢授庶
職老病者則賜歸于鄉閱二日中秋諸君以史
事甫成而佳節適至又樂上賜之優渥而惜同
局之將違也乃即所寓天界佛寺之中庭置酒
為翫月之賞分韻賦詩以紀其事啓得衢字云

聖主念前鑒述作徵名儒羣來高館間廁跡愧我愚孰
謂此責輕毫端有褒誅書成進丹陛召對共拜趨去留
雖不同雨露均沾濡已淹三時勞可廢一夕娛况逢端
正月當空照眉鬚流光滿金界境與人間殊廣庭布長
筵嘉肴薦芳腴豈唯多士集亦有名僧俱興酣貴形忘
諧笑不復拘觴行豈辭勤仰看轉斗樞明晨即分袂此
樂誠須臾人生四海間相見皆友于不知誰使令流蕩
無根株忽然此相遇旋復成天隅願各崇令名道遙步

亨衢明年重見月相憶當長吁

寄題鄞縣青山寺鐘秀樓

東湖秀可攬造化夙所聚聞有釋子居雲中構層宇剎
出辨遠岑帆迴識修渚島外月上海虹邊樹含雨願言
此登眺去作逃禪侶西崦暮鐘時憑闌共僧語

曉出趨朝

正冠出門早杳杳鐘初歇嘶騎踏嚴霜驚鴉起殘月透
迤度九陌窈窕瞻雙闕長卿本疎慢深愧陪朝謁

送顧式歸吳

顧君野王孫與我生共縣故鄉未曾識却在他鄉見
留連忽東還長揖袖詩卷自言吳中好稻熟湖蟹賤欲卧
煙雨舟醉讀三高傳余方謬通籍講帷近清殿故園豈
不懷君恩正深戀遠欲謝鄉人殷勤附君便

御溝觀鵞

白雪泛金塘羣翻動曙光危棲翹獨趾亂唼引修吭池
中鵞可竝廷內鷺難行自憐觀詠者江湖興未忘

夢姊

我家白頭姊遠在婁水曲昨夜夢見之千里地誰縮不
知別已久尚作別時哭覺來旅齋空風雪灑窗竹田家
有弟妹終歲喜相逐我非王事縻胡忍離骨肉城東先
人廬尚有書可讀何當乞身還親為姊煮粥

荅定水寺芭公

日晏初出院間齋一蕭然忽枉名僧書始知在清泉憶
昔雲巖居共締林中緣夏陰繞澗吟秋霽間閣眠睽合

苦難常別來歲頻遷趣同貴道在跡異慙名牽明月出
東海想照空山禪無因荷衣襜往禮高峰前

訓謝翰林留別

啓與同郡謝君徽同徵又同官翰林洪武三年
七月廿八日上御闕樓召對擢啓戶部侍郎謝
吏部郎中俱以踰冒辭即蒙俞允賜內帑白金
放歸於鄉

江左稱謝家奕葉多名人君今復秀發瓊枝邁風塵顧

余忝鄉里才華敢論美丹詔偶見徵雲蘿歛同起謁帝
入九闕咫尺瞻天顏從茲謬通籍接武諸公間朝侍青
坊讀夜陪玉堂宿講罷分御羹吟成刻官燭出入在兩
宮與君無不同自慙本鷗鷺亦得隨鴈鴻朝朝禁門下
聽雞共騎馬上國多故人情親似君寡竝命超列卿寵
極翻憂驚我叨掌國計君佐持銓衡偕辭向明主叩天
聽天語勅賚內帑金東還特相許拜賜出皇都人言似
兩疏月明照宮錦同棹入中吳吳中故鄉道雨歇秋光

好青山度水迎喜我歸來早落日下長洲分攜忽解舟
如何到家喜却有別君愁別君去還邇只隔吳江水離
思與秋長蘆花三十里來往片帆通相期作釣翁高歌
雖鄙野猶可贊王風

過白鶴溪

昨發白鷺洲今過白鶴溪溪流幾迴轉只在晉陵西月
出女猶浣雲深猿自啼茅峰雖咫尺無計躡丹梯

至吳松江

江淨涵素空高帆漾天風澄波三百里歸興與無窮心
期弄雲月迢遞辭金闕晚色海霞銷秋芳渚蓮歇久別
釣魚磯今朝始拂衣忘機舊鷗鳥相見莫驚飛

始歸田園

辭秩還故里永言遂遐心豈欲事高蹇居崇自難任清
晨問田廬荒蹊尚能尋秋蟲語左右翳翳桑麻深別來
幾何時舊竹已成林父老喜我歸攜榼來共斟聞知天
子聖歡然散顏襟相期畢租稅歲暮同謳吟

其二

白露蕪草木荒園掩窮秋歸來一艾理始覺吾廬幽高
柳蔭巷疎清川映門流落日望禾黍離離滿西疇乍歸
意自欣策杖頻覽遊名宦誠足貴猥承懼愆尤早退非
引年皇恩未能酬相逢勿稱隱不是東陵侯

睡覺

爐熏霽宿潤秋滿牀屏裏曙色透窗來幽人眠未起風
驚露樹怯日出煙禽喜却憶候東華朝衣寒似水

與王徵士訪李鍊師遂同過師林尋因公

玄館啓真境紺園闕清香茲晨兩地遊乍出囂煩鄉鳥
鳴桂花落澗戶秋風涼開士演金偈羽人薦瑤觴亦有
詞苑英清芬吐華章愧我自徵起束帶忝周行山林久
在念那期復來翔睽合固知妄去來亦何常誰言道各
異妙契宜相忘

效樂天

誰言我久賤明時已叨祿誰言我苦貧空倉尚餘粟辭

闕是引退還鄉豈遷逐舊宅一架書荒園數叢菊俗緣
任妻子家事煩童僕性懶宜早閒何須暮年促猶著朝
士冠新裁野人服杯深午醉重被煖朝眠熟旁人笑寂
寞寂寞吾所欲終老亦何求但懼無此福功名如美味
染指已云足何待厭飽餘腸胃生疾毒請看畱侯退遠
勝主父族我師老子言知足故不辱

新春飲王七孝廉家

江雨靄江郭寒姿變春華鳥欣已交音梅慘尚吐花此

時高堂上晨起獨感嗟歲換固有常時清樂無涯蕭蕭
風吹巾竹外度遠沙相過偶一醉今夕憐酒家

詠軒

肅肅布華榻冷冷罷朱絃臨楹一流睇幽事忽滿前池
草方依微庭柯正蔥芊偶爾發孤詠聊茲寫中悵景融
理自得詎辨螭與妍猶慙至妙意寂寞非言宣

施君眠雲堂

君字可堂眠
雲其號也

古并一高士白雲與之儔性懶復好眠招雲宿林丘下

雲作簾席上雲作衾裯雲去稍舒滕雲來正蒙頭平生
無心夢雨雲兩悠悠自言眠雲樂世無一可侔浩然身
欲飄若乘無倪舟朝至乎帝鄉夕返乎仙洲寧知日月
旋但覺乾坤浮天雞叫不醒昏昏空巖幽我觀山川氣
出入不可求或逐鸞鶴翔或從蛟龍遊或為風伯驅狼
藉不得收或遭雨師怒奔走無能休小生膚寸間大覆
遍九州變化實多狀欲筭苦費籌奈何一室中爾獨解
使留我行塵務區願出久未由舉足常防危開眼即見

愁不如閉戶眠往尋孔與周愧無山中緣雲肯相從不
惟當去從爾一夢三千秋

卧病東館簡諸友生

抱疾卧東城文墨成久荒翔鴻乍流響時菊忽殞芳繁
陰盡不舒何如殊積傷良儔秉高誼寡昧豈見忘車馬
限泥潦無由接華觴平居歡固難况乃時非康何以度
茲運相勗蹈其常

答張院長雨中見懷

林園寢扉掩閒坐道心生山藥翻寒色塘漪含曉清乍
違枉芳札遠憶愧深情此日知同寂梧窗聽雨聲

春日言懷

暮歸東市門道路聞悲啼駐馬一借問荅云征人妻征
人新戰歿飲恨沉黃泥有兒在哺下飢來食無糜誓將
割茲愛棄去從東西我看巢中燕雛長隨母飛皇天仁
萬物兼照理弗違此獨何奇偶不能與之齊躊躇去復
顧使我心肝摧

施澤阻風

客行阻風濤捨舟步江側荒村經戰餘草木盡愁色夜
投土屋中月出林半黑燃薪燎我衣吹黍作我食夜長
關塞寒歸夢何由得遙想倚閭親中宵淚橫臆

送張隱君歸耕西山

山中久無人秋風桂枝哀朝逢還山客言趣白雲期人
出君乃遁嗟哉此何時東岡有良田負耒當自治四體
雖云勞歲晏可免飢而來未能返驅車竟何之

過峽石

青山夾長溪溪上有魚市土門閉落日野氣白於水虎
行車迹外鳥起鐘聲裏吳語問居人到州還幾里

送劉使君

去年送使君路遠已海湄今年送使君路遠復過之路
遠豈足言人遠自可悲夕晏鮮共歡畫出之竝馳君懷
孰可語予過疇能規此行剖竹符東方撫惇嫠王事正
靡盬奚暇及爾私但令中弗遷庶以慰所思

送周將軍請老歸耕

鞍馬息戎役筋力喜尚全
買牛西岡垂聊復治廢田
零雨何濛濛決流亦涓涓
良苗及時新人情一欣然
甘此耕耘勞忘彼富貴妍
心同老農夫閔閔望有年
家廩儻得高尚願輸資邊

夜登南樓觀月

迢迢海上樓月出嘗先見
吐嶺乍分規臨波已澄練
蒼茫城闕閉歷落星河轉
毋違中夜歡皓景應難戀

欽定四庫全書

欽定四庫全書
卷七

大全集卷七